

清源鄉志卷之一

星野

星土辨於保章十二次之所配彈丸下邑所弗遺也傳曰實沈主參晉之分野屬焉清源密邇省會以察妖祥端在乎是志星野

左傳昭公元年子產曰帝后遷高辛氏之子實沈於大夏主參唐人是因以服事夏商武王邑姜方震太叔夢帝謂已余命而子曰虞將與之唐屬諸參而蕃育其子孫及成王滅唐而封太叔焉故參

清源鄉志

卷之一

一

爲晉星

甘氏曰參爲忠良孝謹之子明大則臣忠子孝安吉

古稱太原參井分野此統一郡而言據交城縣志參井分屬辨一統志武備志雲中雁門俱曰入東井汾州則曰參太原北與雲中雁門界西南與汾州界當二宿之交則所轄之地豈能曲折如一必有參差出入於二宿之間者故曰參井蓋言五州十二縣半屬參半屬井耳非謂太原所屬諸邑俱

半參半井也陽曲附郭郡城自應分屬參井清源  
界在太原汾州之間其地距汾州不遠自當不主  
井而主參又按圖書編云太原參井分野平陽觜  
參分野潞安參井分野汾州參分野大同昂畢分  
野澤州觜參分野遼州參井分野沁州參井分野  
由此二說推之太原在趙魏之中介汾潞沁遼之  
間統一府而言之則爲參井就清源一邑言之則  
獨爲參無疑也

參錄府志太原志